

Qamutit motorillit akileraarutaat pillugit Inatsisartut inatsisaata allanngortinneqarneranik Inatsisartut inatsisaat nr. 7, 11. november 2004-meersoq(Qamutit motorillit savaateqarfinni tuttuuteqarfinnilu ingerlatsiviusuni il.il. inuussutissarsiutigalugu atorneqartunut akileraarummik akiliinnginnissaq)

§ 1

Qamutit motorillit akileraarutaat pillugit Inatsisartut inatsisaanni nr. 3, 16. juni 1987-imeersumi, Inatsisartut inatsisaatigut nr. 14, 7. november 2003-mi kingullermik allanngortinneqartumi makku allannguutigittinneqarput:

1. § 1 ima oqaasertaqassaaq:

"§ 1. Qamutit motorillit Kalaallit Nunaanni aqqusinikkut angallannermut inatsit naapertorlugu nalunaarsorneqartussaasut Landskarsimut nakkartussamik akileraartassapput.

Imm. 2. Akileraarummilli akiliisussaangitsut tassaapput:

- 1) qamutit motorillit qatserutit annaassiniutillu,
- 2) napparsimmaveqarfiup napparsimasunik angallassissutai,
- 3) qamutit motorillit nunat allamiut aallartitaqarfiinit imaluunniit konsuleqarfiinit imaluunniit aallartitaqarfimmi sulisunit qallunaatut innuttaassuseqanngitsunit pigineqartut, aammalu
- 4) qamutit motorillit savaatillit tuttuutillillu sulinerannut atorneqartartut, savaateqarfiit tuttuuteqarfiillu illoqarfiit nunaqarfiillu avataanni inissisimasut sumiiffinnilu taakkunani qamutit motorillit arlaqanngitsuinnaat pigineqarpata akileraaruteqartussaangitsunut ilanngunneqassasut.

Imm. 3. Qamutit motorillit innarluutilinnik angallassissutit, qamutit toqusut illerfiinik assartuutit aammalu qamutit motorillit, aalajangersimasumik ingerlaarfeqarlutik bus-itut atorneqartartut akileraarummik akiliinnginnissaat Naalakkersuisut akuerisinnaavaat."

§ 2

Inatsisartut inatsisaat 1. januar 2005-miit atuutilissaaq.

Imm. 2. Ukiup affaanut, piffissami 1. aprilimiit 31. december 2004-p tungaanut qamutinik Motorilinnik pigisalinnut akileraarummik akiliuteqannginnissamut § 1, imm. 2, nr. 4-imi taaneqartunut akiliutigisimasinnaasaannik utertitsisoqassaaq.

Hans Enoksen

/

Josef Motzfeldt